

Tutu ña ni ke'i San Pablo kua'an nda'a' Tito

Ti'vi' ra cha'an' ra

1 ¹Yu'u nduu' Pablo, te xika' nuu' nuu' Ndiosí, te nduu' tu i te ni tianu' Jesucristo sania'á ichi' a, te kuini ne ni nakaxin Ndiosí kuni nia Jesús, te kundani nia ña ndixa ña kandixa' e'. ²Xa'a' a jaan' na ndiatu' ini nia kivi' ñuu ña koo' kivi' ndi'i, ña xa ni taxi Ndiosí kuento a xa'a' ndee xta'an' kii' tia'an kua'a' iin yivi', te ña jaan' ndii, xini xa'an' a. ³Kii' ni xaa kivi' ña ni nakaxin a ndii, ni satuví a kuento jaan'. Te mii' Ndiosí, ña sakakú yoo', nduu' ña ni sakuiso' chuun' yu'u te ka'an ndoso' i ña jaan' nuu' ne yivi'. ⁴Tito, yo'ó ndii, ndee naa si'e mii' xna'a i nduu' un' xa'a' a ña ini inga' e' xini e' Jesús, te ti'vi' i tutu yo'o' nda'a' un'. Te na sañu'u' na Ndiosí, yuva' e', xiin' xto'o' e' Jesucristo, ña sakakú yoo', yo'ó, te na kuvita tu ini a xa'a' un', te na taxi tu a ña maní' koo' xiin' un'.

**Saa kuní a kaka nuu te xixa, te xa'ndia
chuun' nuu' ne nakayá xa'a' Jesús**

⁵Kii' ni nakoo i yo'ó nuu' ñu'u' ña naá i'nu ña nani' Creta ndii, ni xaa i sakan' te ndasava'a un' ña kuní xinu, naa kuu' ña sakuiso' chuun' un' te xixa, te ka'ndia chuun' nuu' ne nakayá xa'a' Jesús i'in ñuu, saa ni tiachuun' i yo'ó. ⁶Te iin te xixa, te xa'ndia chuun' nuu' ne nakayá xa'a' Jesús ndii, kuní a ña kunduú ra iin te ka'an va'a ne yivi' xa'a', te iin ndaa' kuiti' ña' si'i ra koo, te si'e ra ndii, kuní a ña ini nia xini nia Jesús, te kunduú nia ne nia'a, ni ndee kunduú tu nia ne so'o'. ⁷Kuachi ndii, te xito' ne nakayá xa'a' Jesús jaan' ndii, kuní a ña kunduú ra iin te ka'an va'a ne yivi' xa'a', sakan' ña chuun

nuu' Ndiosí xaa' ra. Te kúní a ña kunduu ra te ñuñu', ni ndee te i'ni', ni ndee te xini, ni ndee te kunta'an' xiin' ne yivi', ni ndee te xini xa'an' ne yivi' te ki'in ra xu'un'. ⁸Süu' jaan' ndii kuní a ña kunduu ra iin te natiin' maní' ne yivi' kii' xaá nia vi'e ra, iin te ka'an va nimá saa ña va'a, iin te kuu' kaxi', iin te xachuun' ndaku, iin te xika' ndoo nuu' Ndiosí, iin te xito' xiin' mii'. ⁹Te sakan' tu kuní a ña kuiin ni'i ra saa nii' ni sakuaan ra tu'un va'a ña kandixa' e', te koo tu'va ra, te kaní kuento ra ne yivi' xiin' ña va'a ña sania'á ra xa'a' ña ndixa ña kandixa' e', te sakandixa' ra ne xikuita'nú nuu' tu'un va'a jaan'.

¹⁰Kuachi ndii yoo kua'a' te so'o nuu' ña kandixa' e' jaan', te ka'an saka ra, te xini xa'an' tu ra ne ini xini Ndiosí. Sakan' xaa' naa kuu' te ka'an ña kuní a ña kasa'a e' tuni iin' e'.

¹¹Täxi' un' sania'á te jaan' ne ndikún ichi' Jesús, sakan' ña sasana' ra sakuu' ne ndiee' vi'e mii' ko'ni' ra sania'á ra. Te siin' tuku' ndii, süu' xa'a' Ndiosí xaa' ra chuun jaan', süu' jaan' ndii xa'a' a ña kuni ki'in ra xu'un' kuiti' xaa' ra a. ¹²Xa'a' a jaan' na xa ni ka'an tiakú iin te ñuu Creta ñaa' xa'a' ne ñuu ra xta'an' ndii: “Ne ñuu i, ne Creta ndii, vixi va mii' ne jaan', te kuu' nia ndee na kiti' iku', te sakan' tu xixi' xka'ndia nia, te suxan' va tu nia”, ni kachi ra. ¹³Te ña ndaku ni ka'an ra, sakan' na kuní a ña kondia yu'u' ndiee' un' ne ndikún ichi' Jesús jaan', te nakuita ni'i tukuu nia nuu' ña ini e' xini e' Jesús, ¹⁴te saa tu nia kuenta kuu' kuento ña ni nata'vi' xini' te judío, ni ndee saa tu nia kuenta kuu' ña ka'an chuun' te yivi', te ni saxioo xiin' mii' nuu' ña ndixa xa'a' Ndiosí.

¹⁵Ne ini xna'a xini Jesús ndii, ndoo nimá nia te ndoo tu sakuu' ña'a nuu' nia. Ndisu ne xa ni tivi' nimá, te ini tu nia xini nia Jesús ndii, köo' ndee iin ña ndoo nuu' ne jaan'. Kuachi ndii mii' ndi'i' ña kuäsa' kuní xanini nia, te nätuví' ini nia xa'a' ña nia'a, ña xaa' nia. ¹⁶Ka'an ne jaan' ña xini nia Ndiosí, ndisu xiin' ña xaa' nia ndii, nia'á nia ña ne xini xa'an' nduu' nia. Te kini va kuu' nia, te nduu' tu nia ne so'o, te sakan' tu köo' kivi' xaa' nia ndee iin nuu' ña va'a.

Saa kuní a sania'á Tito

2 ¹Ndisu yo'ó ndii, ka'an kuiti' un' ña nakuitá xiin' ña ndixa ña kandixa' e'. ²Te xixa ndii, ka'an un' xiin' ra ña kuní a koo ñu'u' ini va ra, te kuní tu a ña kunduu ra iin te

ka'án va'a ne yivi' xa'a', te kuní a ña kuu' kaxi' ra, te kuní a kuiin ni'i tu ra nuu' ichi' Jesús, te kuní a ña kuiin ni'i tu ra nuu' ña kundani ra ne yivi', te kuiin ni'i tu ra tee' ndee yoo tundo'o' nuu' kivi' ñuu ra. ³Sakan' tu ña'a' xixa ndii, sania'á un' nia ña kuní a kaka ii' nia saa kuní Ndiosí. Te sätaví kuachi nianí nia ne yivi', te ni ndee kunduú tu nia ne xtani va ko'o vino, ndee va'a ka na sania'á nia ña va'a, ⁴te kondia yu'u' nia ña'a' sava ña kundani ne jaan' ii' nia xiin' si'e nia. ⁵Te na kondia yu'u' tu nia ne sava jaan' ña kunduu nia ne kuu' kaxi', te kunduu tu nia ne xika' ndoo, te koto maní' tu nia ne ndee' vi'e nia, te va'a tu nimá nia kuní nia ne yivi', te sakan' tu koto ka'nu' nia ii' nia. Sakan' te koo' ne kuvi kania'a xa'a' tu'un Ndiosí.

⁶Sakan' tu ne sava ndii, kondia yu'u' un' nia ña na kunduu nia ne kuu' kaxi', ⁷te xiin' ña xaa' un' nia'a un' nia ña xachuun' ndaku un' xiin' sakuu' ña xaa' un', te ki' sania'á ña'a' un' ndii, saa un' ña jaan' xiin' iin kani' nimá un', te saa tu un' saa xata'an kuini e'. ⁸Te sakan' tu sania'á ndaku un' ne yivi', te koo' ne kuvi kania'a xa'a' tu'un va'a, sakan' te yoo ka xikuita'nú nuu' ña sania'á un' jaan' ndii, kuka'an nuu' nia, kuachi ndii koo' ña nia'a kuvi ka'an nia xa'a' e'.

⁹Te sakan' tu ne xiko' ni' iin xto'o' ndii, kondia yu'u' un' nia, ña taxi so'o nia ña ka'án chuun' xto'o' nia xiin' nia, te kaka nia xakuatia' nia te jaan' xiin' sakuu' ña xaa' nia, te kani' ta'an' nia kuento xiin' ra. ¹⁰Te sakuina' nia ña'a' xto'o' nia jaan', süu' jaan' ndii kuní a ña sachuun' ndaku xna'a nia. Sakan' te kuní sakuu' ne yivi' ña ndatun' ya'a ka'án ña ndixa xa'a' Ndiosí, ña ni sakakú yoo'.

¹¹Kuachi ndii xa ni nia'a tuvi' Ndiosí ña ndani mii' a yoo'. Sakan' na katani' a ña sakakú a sakuu' yoo' ne yivi' iin yivi' nuu' kuachi e'. ¹²Te xiin' ña ndani a yoo' jaan' sania'á a yoo' ña kuxioo e' nuu' sakuu' nuu' ña nia'a, xiin' ña too ini, ña yoo iin yivi'. Te kunduu e' ne kuu' kaxi', te kaka ndaku e' iin yivi', te saa e' ña kuní Ndiosí, ¹³ña ndiatu' e' xaa ña ndiatu' ini e' xa'a', ña nduu' kivi' ndatun' ña kixin Ndiosí ka'nu' koo' chukuu', ña nduu' Jesucristo, ña sakakú yoo'. ¹⁴Te ni sanakua'a xiin' mii' a, te ni xi'i a xa'a' kuachi e' te sandoó ndiká a yoo' nuu' sakuu' nuu' ña nia'a, te ndasandoo a nimá e'. Sakan' te kunduu e' kuenta mii' a, ne nduu' nditia a, ne xaa' xa nuu' ña va'a kuiti'.

¹⁵Xiin' sakuu' ña ndiee' ña kumi' un' ka'an un' ña yo'o' nuu' ne yivi' ñaa', te sandieni un' nia, te ka'an ndiee' tu un' xiin' nia. Te täxi un' ndee iin xa'a' ña ka'an kui'e ndee iin ne yivi' xa'a' un'.

Saa kuní a kuú ne ndikún ichi' Jesús

3 ¹Sanaka'an' naa sanaka'an' un' sakuu' ne ta'an' e', ne nduu' kuenta Jesús, ña kuní a saxinú nia ña ka'an te ndiaa chuun' nuu' ñu'u' e', xiin' te xa'ndia chuun' nuu' ñuu e'. Te na saxinú nia ña ka'an chuun' ra, te na koó tu'va tu nia te saa nia sakuu' ña va'a. ²Te na kánia'a nia xa'a' ndee iin ne yivi', te na káni' ta'an' nia kuento xiin' ne yivi', süu' jaan' ndii maní' kuú nia xa'a' ne yivi' nia'á nia nuu' sakuu' ne jaan' ña maso kuu' nia.

³Kuachi ndii ni kuú tu yoo' xta'an' naa kuu' ne jaan', ni nduu' e' ne küu' kaxi', te ni nduu' tu e' ne so'o' nuu' Ndiosí, te xika' ni yoo' e' nuu' ña ndixa, te ni xiko ni'í' sakuu' nuu' ña nia'a, ña ndioo' ini mii' e' yoo', xiin' ña sii', ña yoo' iin yivi'. Te xa nuu' nuu' ña nia'a ni tiaku e', te ndasi' nuu' e' ni xini ta'an' e', te kini va ni ín e', te ni ndasi' ta'an' e'. ⁴Ndisu Ndiosí, ña sakakú yoo' ndii, ni nia'a a ña kuvita ini a xa'a' ne yivi' iin yivi' xiin' ña ndani a sakuu' e'. ⁵Te süu' xa'a' a ña ni xaa e' ña va'a na ni sakakú a yoo', süu' jaan' ndii xa'a' a ña kuvita ini a xa'a' e' ni xaa a ña jaan', sakan' ña ni sandoyo' a kuachi e' kii' ni kaku e' tuku ichi', te ni na'in e' kivi' ñuu xaa' ni xaa Espíritu Santo, ⁶ña ni sakutu' Ndiosí nimá e' xa'a' ña ni xaa Jesucristo, ña sakakú yoo'. ⁷Ni xaa a sakan' te sandaku a nimá e' xa'a' a ña ndani mii' a yoo', te natiin e' kivi' ñuu ña koo' kivi' ndi'i', ña ndiatu' ini e' xa'a'.

⁸Ña yo'o' ndii, ña ndaku nduu' a, te kuní i ña ka'an ndiee' va un' un xiin' ne yivi', sakan' te kundí'ni ne ini xini Ndiosí te saa nia ña va'a. Te ña jaan' ndii, ña va'a va nduu' a, te chindiee' kua'a' tu a sakuu' ne yivi'. ⁹Ndisu káni ta'an' un' kuento xiin' ne yivi' xa'a' ña kuäsa' kuní, ni ndee xa'a' kuento yata' ña ka'an nia xa'a' ne xii' yata' e', ni ndee xa'a' tu'un ndei' Ndiosí. Kuachi ndii ña kuäsa' kuní nduu' a kii' xaa' e' sakan', te kuäsa' tu chindiee' a. ¹⁰Te ne xika' nata'vi' ne ndikún ichi' Jesús ndii, kani ña'a' un' kuento iin uvi ta'an ichi', te naa' täxi so'o' nia ña ka'an un' ndii, täxi ka un' nduün nia xiin' ndo'.

¹¹ Kuachi ndii xa xini kaxi' e' na xiin' na jaan' nia'á ne jaan' na xa ni sanako' xiin' mii' nia nuu' na ndixa, te xa kuachi mii' nia katun' na'a'.

Ka'án Pablo xiin' Tito xa'a' na kuni a saa ra

¹² Te kii' ti'vi' i Artemas uun Tíquico mii' ndu'u' un' naa' ndii, saa un' sakuu' na nduxa' te kixin koto un' yu'u' nuu Nicópolis. Sakan' na ikan' xanini i xka'ndia i yoo' vixin.

¹³ Te chindiee' un' te xikui'ni xa'a' ne yivi', te nani' Zenas, te chindiee' tu un' Apolos xiin' yoo ka nduu' na'a na kuni nuu' uvi saa' ra, te kuvi nakaa ra ku'un ra xiin' tu'un Ndiosí, sakan' te kundo'o ra xa'a' ndee iin na'a. ¹⁴ Sakan' te kuvi sakuaan ne ndikún ichi' Jesús xiin' e' saa nia na va'a, te chindiee' nia ne natiín xna'a, te kunduu nia ne chuun va nuu' Ndiosí.

Ndeji' Pablo Tito

¹⁵ Ti'vi' sakuu' ne chindiee' ta'an' xiin' i cha'an' un'. Te kua'an Ndiosí koo na ne iini inga' xini Jesús xiin' e', ne ndani yoo'. Na sañu'u' na xto'o e' Jesucristo sakuu' ndo'ó. Sakan' na kunduu a.